

ILUARSISSUT

Isumaliutissiissut 3. maajimik ulluligaq taarserpaa

(Ataatsimiititaliap inassuteqaataani piffissaliunneqartup iluarsinera, taamaalillunilu
piffissaliunneqartoq UPA25 sioqqullugumut allangortinneqarluni)

**Ullukinnerup ullup affaa sulinngiffiusalernissaa siunertaralugu Naalakkersuisut
qulaajaanissaannik peqquneqarnissaannik Inatsisartut aaliangiiffigisassaattut
siunnersuut. Qulaajaaneq periarfissanik assigiinngitsunik qanoq iliornikkut
ullukinnerup ullup affaanik sulinngiffiulersinnejarsinnaaneranik qanorlu
ningaasatigut kinguneqarsinnaaneranik imaqassaaq. Qulaajaaneq UPA 2025-mi
saqqummiunneqassaaq.**

Inatsisartunut ilaasortap Peter Olsen, Inuit Ataqatigiinneersup saqqummiussaa

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerneqarneranut

ISUMALIUTISSISSIONAA

Ataatsimiititaliap suliarinninnermini ilaasortarai:

Inatsisartunut ilaasortaq Najaaraq Møller, Siumut, siulittaasoq
Inatsisartunut ilaasortaq Knud Mathiassen, Naleraq
Inatsisartunut ilaasortaq Dines Mikaelson, Siumut
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Edvard Nielsen Aronen, Inuit Ataqatigiit

UPA2024-mi ulloq 17. april siullermeerininnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Ullukinnerup ullup affaa sulinngiffiusalernissaa siunertaralugu Naalakkersuisut qulaajaanissaannik peqquneqarnissaannik qanorlu ningaasatigut kinguneqarsinnaaneranik

misissuisoqarnissa siunnersuummi matumani siunnersuuteqartup kissaatigaa. Ulloq immikkullarissoq pillugu nalliusisarnissaq siunnersuummi siunertarineqarpoq, taamaaliornikkullu meeqqat inuusuttullu kiisalu suliffeqarfiiit soqutiginninnerulersinnaallutik.

Siunnersuutip Inatsisartuni siullermeerneqarnera

Ullukinneq kalaallit inuiaqatigiivinit nalliuttoriutigineqartartoq, tamannalu kalaallit kulturiannut pingauteqartorujussusoq siullermeerinninnermi isumaqatigiiffiuvoq. Aningaasatigut kingunerisassai aammalu ullukinnermi ullup affaa, ulloq ataaseq sulinngiffiusasanersoq imaluunniit ulloq alla sulinngiffiusartoq ullukinnersiortarnissamut nuunneqassanersoq oqallisigineqarpoq. Taamaakkaluartoq ullukinnermi sulinngiffeqartalernissaq amerlanerussuteqartunit atuutilersikkusunneqarpoq ulloq sulinngiffiusartoq alla nuunneqarsinnaappat taamaalillunilu inuiaqatigiinnut annertunerusumik aningaasartuutaasussaanani. Tamanna tunngavigalugu soqutigisaqaqatigiinnut attuumassutilinnut ullukinnermi sulinngiffeqarneq qanoq kinguneqarsinnaanersoq misissoqqullugu ataatsimiitaliamut kaammattuutigineqarpoq.

Sassartitsinerit

Sulinermik Inuussutissarsiuteqartut Kattuffiat (SIK) aamma Sulisitsisut (GE) ulloq 29. april 2024 ataatsimiitiitaliamut sassartitsippu. Siunnersuuteqartup toqqagassatut periarfissat sisamat saqqummiussai illuatungeriinnit isummersorfigineqarput (**ilanngussaq 1 aamma 2**). Matumuuna SIK ilisimatitsivoq ullup affaanik sulinngiffeqartarnissaq inuiaqatigiinnut 3 mio. kr. missaani akeqassasoq, aammalu ulloq tamaat sulinngiffeqartarnissaq 6 mio. kr.-ussasoq, tassa ulloq sulinngiffiusussaq nutaaq atulersinneqassappat ulloq sulinngiffiusoq alla nuunneqarnani (**ilanngussaq 1**).

Ataatsimiitaliap siunnersummik suliarinninnera

Ileqqutoqqat naleqartitat kinguariit tullissaannut ingerlateqqinnejarnissaannik siunnersummut pingaarnertut tapersiineq qulakkeerinnissasoq ataatsimiitaliamit oqaatigineqarpoq.

Siunnersummik siullermeerinninnermi Aningaasaqarnermut Akileraartarnermullu Naalakkersuisoq allannguutissatut siunnersummik saqqummiussivoq:

Ullukinnerup sulinngiffik allap ullumi affaa nuunneratigut affarmik sulinngiffiunissaanut oqallinnissaq siunertaralugu pisortani namminersortunilu isumaqatiginninniarsinnaatitaasut attaviginissaannut Naalakkersuisut peqqusinissaannut Inatsisartut aalajangiiffigisassaattut siunnersuut

Ullukinnerup sulinngiffik allap ullumi affaa nuunneratigut affarmik sulinngiffiunissaanu soqutigisaqaqatigii isumaqatiginninniarnernut ilaatinnejarnissaat Naalakkersuisut allannguutissatut siunnersuutaanni allaqqasoq ataatsimiitaliamit maluginiarneqarpoq.

Pisortani namminersortunilu soqutigisaqaqatigii attuumassutillit peqatigalugit periarfissanik

eqqartuinissaq pingaaruteqartoq ataatsimiititaliamit oqaatigineqarpoq, taakkummatami isumaqatigiissutinut tunngasutigut isumaqatiginninniarsinnaatitaasut. Suliniutip nunatsinni inuaqatigiinnut aningaasatigut kinguneqassasoq ataatsimiititaliamit ilisimaarineqarpoq.

Taakkua peqqutigalugit ataatsimiititaliap SIK aamma GE aggersarpai, ullukinnermilu sulinngiffeqartalernissamut periarfissat tassungalu aningaasatigut kingunerisinnaasai eqqartorlugit. Illuatungeriit siunnersummut pitsaasumik tapersersuinerat ataatsimiititaliamit maluginiarneqarpoq, piumasarineqarlunili suliffeqarfiiit isumaqatigiissutillu atuuttut ataqqineqarnissaat, taamaalillunilu SIK-mi aamma GE-mi ilaasortanut aningaasartuuteqarnerulernissamik nassataqarnani. Illuatungeriit siunnersummut pitsaasumik isiginninnerat ataatsimiititaliamit naammagisimaarneqarpoq. Taamatuttaaq piumasarineqartut sappinngisamik naapertorneqassasut ataatsimiititaliaq isumaqarpoq.

Siumuminngaanniit allannguutissatut siunnersuut siullermeerinninnermi saqqummiunneqartoq siunnersuutip matumani pineqartup sinaakkutaasa avataani inissismasoq ataatsimiititaliamit oqaatigineqarpoq. Siumuminngaanniit allannguutissatut siunnersummi allaqqavoq 2024-mi ukiakkut ataatsimiinnermi suliarineqartussamik 2025-milu atuutilertussamik Naalakkersuisut inatsisilioqqullugit peqquneqassasut. Ataatsimiititaliap allannguutissatut siunnersuutaa kingunerissavaa Siumuminngaanniit allannguutissatut siunnersuutaat atorunnaassasoq ataatsimiititaliamit oqaatigineqarpoq. Allannguutissatut siunnersuut aalajangiiffigisassatut siunnersummit matumani pineqartumi taassisutaasussamit allaaneruvoq taamaattumillu sinaakkutigineqartut iluaniinnani:

***Ullukinnerup ulloq naallugu sulinngiffiusalernissaa siunertaralugu
Naalakkersuisut 2025- miit atuutilertussamik inatsisilioqqullugit
peqquneqarnissaannik Inatsisartut aaliangiiffigisassaattut siunnersuut.
Siunnersuut UKA24-mi saqqummiunneqassaaq.***

Siunnersuutip aningaasatigut kingunerisassai

Inatsimmik allanngortitsilluni suliaqarneq atorfillip ataatsip ukiumut sulineranik 250.000 kr.-nik naleqassasoq siunnersuuteqartup aalajangiiffigisassasut siunnersummi matumani allappaa.

Ullukinnermi ullup affaa sulinngiffeqartalernissamut **periarfissat misissorneqassasut** Naalakkersuisut peqquneqarnissaannik siunnersummi matumani allaqqasoq, ilutigisaanillu aningaasatigut kingunerisinnaasaani **inatsisip allanngortinneqarnissaanik suliaqartoqarnissaanik** allaqqasoqartoq ataatsimiititaliamit maluginiarneqarpoq. Aningaasatigut kingunerisinnaasaani periarfissat sisamat siunnersuuteqartumit allanneqarsimasut aamma ataatsimiititaliamit maluginiarneqarput.

Naggataatigut Naalakkersuisut inatsimmik suliaqaqqullugit peqquneqarnissaat piviusunngortinneqassappat, taamaalilluni Inuit Ataqatigiit aamma Siumut allannguutissatut

siunnersuutaat akuerisassanngorlugu innersunneqarluni, siunnersuummi aningaasatigut allaffissornikkullu kingunerisinnaasai naapertuuttumik allaqqasut ataatsimiitaliamit maluginiarneqarput.

Ataatsimiitaliap inassuteqaatai

- Ataatsimiitaliami amerlanerussuteqartut Inuit Ataqatigiinneersut aamma Siumumeersut allannguutissatut siunnersummik saqqummiussipput tamannalu akuerisassanngortillugu:

Tussiarfissuup ulloq tamaat sulinngiffiusarunnaarsinneratigut paarlattuanilli ullukinneq ulloq tamaat sulinngiffiusaleqqullugu Naalakkersuisut 2025-mi atuutilertussamik inatsisisamut siunnersuusiornissamut peqquneqarnissaannik inatsisartut aaliangiiffigisassaattut siunnersuut. Inatsisisatut siunnersuut UPA 25 sioqqullugu saqqummiunneqassaaq.

- Ataatsimiitaliap isumaqtigii tup Naalakkersuisut allannguutissatut siunnersuutaat itigartitsissutigineqarnissaa innersuussutigaa:

Ullukinnerup sulinngiffik allap ullumi affaa nuunneratigut affarmik sulinngiffiunissaanut oqallinnissaq siunertaralugu pisortani namminersortunilu isumaqtiginninniarsinnaatitaasut attaviginissaannut Naalakkersuisut peqqusinissaannut Inatsisartut aalajangiiffigisassaattut siunnersuut.

Taama oqaaseqarluni isumaliutissiisummilu allassimasunut paasinnilluni ataatsimiitaliap siunnersuut aappassaaniigassannngortippaa.

Najaaraq Møller
Siulittaasoq

Knud Mathiassen

Dines Mikaelsen

Peter Olsen

Edvard Nielsen Aronsen
